

Kanpiondarren
25. urteurrena

Iruindar guztien euskaltegia

25. urteurrena ospatzeko ekitaldi ugari antolatu ditu Comedias kaleko Arturo Kanpion euskaltegiak

Arturo Kanpion Iruñeko IKAKo euskaltegian besta giroa da nagusi, 25. urteurrena ospatzen ari baitira hango ikasle eta irakasleak. Denbora ez da alferrik igaro, eta kanpiondarren etxean ere, Comedias kaleko euskaltegian, asko aldatu dira gauzak. Ez da berdina oraingo eta orain dela 25 urteko giroa Iruñeko euskal munduan erreferentzi izan den euskaltegian; bai, ordea, izpiritua.

Eduarne Elizondo / Iruñea

ARTURO KANPION euskaltegiaren 25. urtebetetzea ospatzeko prestatutako ekitaldiak abian dira jada. Apirileko ospakizunen ondoren, astelehenaz geroztik ikusgai da argazki erakusketa bat (Descalzos kaleko Iruñeko Udaleko Erraldioen Txokoa aretoan) hiriko argazkilari gehienek osatua. Argazkilarion lanekin, halaber, Iruñean hogeita bortz urte liburuak kaleratu du Arturo Kanpionek. Argazkiak ezezik, euskaltegi hainbat lagunek urteurrena dela-eta idatzitakoak biltzen ditu argitalpen berriak.

Hilaren 17rako, bestalde, pilota partiduak antolatu ditu euskaltegiak, eta 21erako, kantaldia. Niko Etxart izanen da Gaia-rrerantz antzokian, arratsaldeko 8etatik aurrera. Hilaren 24an, urteurrenaren berezko ospakizuna egingen dute kanpiondarrek. Eguerditik aurrera, harrijasotzaileak —Perurena aita-semeak—, dantzariak —Iruña taldea— eta bertsolariak —Sarasua, Izarzelai, Argiñarena, Mikel Taberna, Manu Gomez, Burgi— izanen dira Gaztelu plazan. Arratsaldeko 2:30etan bazkaria egingen dute euskaltegi kideek Aranzadiko kiroldegian, eta ondoren dantzaldia.

Ekitaldiek aurrera jarraituko dute hilaren 27 eta 29an. Kafentzerkia egingen dute, Nafarroako Antzerki Eskolan, Trokolo eta Kasketa taldeek. Ekainean, bestalde, 3an, Noaingo Gatazkari buruzko hitzaldia eskainiko du Patxi Larriñe, eta biharamunduan, Labrit pilotalekuan, Oskorriren *The Pub Ibiltaria* ikuskitzuna izanen da. Amaitzeko, ekainaren 14an, Iruñeko mugetan barna ibilaldia egingen dute euskaltegi kideek.

Aurrera doan euskaltegia • Argi dago —aurreko ekitaldi zerrenda da horren erakusgarri—, ospakizunetarako bidea zabaltzen du urtebetze batek. Are gehiago 25. a bada, eta are gehiago oraindik, Arturo Kanpion bezalako euskaltegi bat bada urteak betetzen dituen. Baina ospakizunetara-



Euskaltegi gaur egungo irakasle taldeko kide batzuk. Eskuinetik bigarrena, Sagrario Aleman, eta goian, betaurrekoekin, Martin Manterola.

LUIS AZANZA

ko ezezik, atzera begiratu eta oroitzapenak astintzeko aukera ere eskaintzen du halako edozein urtemugik. Eta Arturo Kanpion etxe handiko hainbat biztanle eta lagunek hori egin dute, orriotan bertan.

Jorge Cortes eta Javier Cunchillos, adibidez, neurri handi batean euskaltegiaren sorrera bideratu zuen Etorkizuna Elkar-

teko kide izan zirenek, hastapenak gogoratu dituzte. «San Frantzisko Xabierren, Gurutze plazako institutuan, Eskolapiotan klaseak ematen hasiak ginen. Orduan, Bilbotik Patxi Elgezabal etorri zen soldaduska egitera. Nire etxera askotan etortzen zen, eta hari proposatu nion irakasle hastea. Compañía kalean pisu bat hutsik zegoela esan zidan

Ernesto Torio lagunak; hura hartu, Javier Cunchillosen ize-nean jarri, eta horrela hasi ginen», laburbildu du Jorge Cortesek.

«Mundu guztiarentzat lekua izanen zuen euskaltegia izanen zela pentsatu nuen. Horrek bultzatuta egin nuen lan, eta hala izan da. Hori izan zen hasierako asmoa eta asmo horrek iraun du.

Gaur egun oraindik loratzen ari den euskaltegia da Kanpion, aurrera jarraitzen du. Zergatik? Irakasleak, ikasleak, klaseak... daudelako, baita aurrera egiteko indarra duen Sagrario Aleman bezalako emakume bat ere», gogoratu du Javier Cunchillosek.

Arturo Kanpionen ekarpena hagitx garrantzitsua izan dela uste dute biek, Iruñeko kaleetan

Felipe Rius: «Ongi pasatu nuen, giro polita genuen»

FELIPE RIUS kazetaria ikasle eta irakasle izan da Arturo Kanpion euskaltegian. Ikasle, bi urtez izan zen, eta orain dela hogeitabat. Orduan, Compañía kalean zegoen oraindik euskaltegia, izan zuen lehen egoitza. Felipe Riusek ustez, garai hartan, euskara ikasteko motibazioa orain baino politikoagoa zen. Eta giroa, berriz, aparte: «Irakaskuntza orduan ez zen orain bezain profesionala. Uste dut pedagogia aldetik asko aldatu dela Arturo Kanpion euskaltegia, irakasleak hortara dedikatzen dira orain. Baina lehen, parranda gehiago egiten genuen —barre egiten du—, afari eta poteo asko. Giro aparta genuen gure artean eta oso ongi pasatu nuen euskaltegi eman nituen urteetan».

Bestalde, Iruñeko bizitzan, euskal kulturaren munduan euskaltegia erreferentzia izan dela uste du Felipe Riusek: «Erreferentzia izan da, eta, neu-



rri batean, erreferentzia izaten segitzen du. Beste talde asko dago orain baina gune garrantzitsua izan dela uste dut». Arturo Kanpionen 25. urteurrenean, gainera, hau erran nahi die euskaltegi kideei Felipe Riusek: «Urte askotarako eta ikasle asko izan dezazuela». X

Itxaro Borda: «Lagun asko dut Arturo Kanpionen»

ORAGARREKO idazlea ez da ez ikasle ez irakasle izan Arturo Kanpionen, baina euskaltegiarekin duen harremana sendoa eta aspaldikoa da. Bere idatzietan ere aipatu izan du Arturo Kanpion euskaltegiaren izena, harekin duen loturaren erakusgarri. «Aspaldi sortu zen gure harremana. Lehendabiziko Sagrario Aleman ezagutu nuen, eta gero euskaltegia. Geroztik, beti adiskide gara. Iruñearekin izan nuen lehen harremana euskaltegi kidearekin izan nuen, eta segitu dut. Beharbada ilusio batean bizitzen laguntzen dit eta horregatik segitzen dut, horko jendearekin Iruñean euskaraz egiten ahal dudalako. Denborarekin Iruñeko beste auzoak ezagutu ditut, baina mugimenduak Kanpionera eramaten nau beti».

Euskaltegiaren urteurrena hagitx garrantzitsua da, Itxaro Bordaren ustez: «Biziki ederra da, hor frogatzen baita aguan-



tatzen bada, tunelaren azpitik pasatzen bada, ez bada itzulbiderik hartzen, noizpait argirat ateratzen ahal dela». Euskaltegi kideei zuzendutako asmoak ere baditu: «Arturo bezain zahar bizi, eta 100. urteburua ospatu. Han izanen gara elkarrekin Iruñean, ordua Roch kafetegian». X